

# RUKI

## 7

### *Taqe nraase mwira mwaaquara tura*

<sup>11</sup> ...Sisasiva mwo mwatusa mwira utu Neni mwatusani vuvanta mwira vaintivaravanovaqa vaaqara nraase qoravanovaqa Sisasira vataqinta vuvaro

<sup>12</sup> Sisasiva mwi mwatusara qentaqaa uro takuovanta mwi mwatusaraqintai nraase qoravano qutu vu vaintira mwarenta mwira qunarenta timwa tenta nrurama.

Qutu vu vaintiva taqe nraase mwira mwaaquvano mwauvanta vaaqara nraase qoravano mwi nraaseravaqa mwasenta nruvaro

<sup>13</sup> Sisasiva mwi nraasera takuovaro mwira mwuntusa nruvaro Sisasiva mwi nraaserara mpo se tiro mwirara tiro, Sia nataane, tiro.

<sup>14</sup> Sisasiva mwitaa tiate uro qinkera tumwarovanta vaintinravuvano qinkera mwira mwarosua mwiraqaa mwataate mwauvaro Sisasiva tiro,

araasa vaintio, ne riana qaqi nti vuane tuko, tiro.

<sup>15</sup> Tuvaro qutu vu vaintiva ntiviro quturaraqintai ntiviro kuavaqa tuvaro Sisasiva mwi vaintira nrai nrora mwurama.

<sup>16</sup> Sisasiva mwitaa suvanta vainti nraase qora esaa nroraqamase aatu itovanta Kotira utu tu-aare renta tinta, Mpo paropeti vainti nroravano tiri vutaqaa qovarama viso. Te Kotira nraaqiara suraro mwiva sia tiri pisaivave, tinta. Mwisua mwitaa tuvaro Sisasiva aira mwaro mwasaasava

esaa Iutaa mwaatanivaqa Iutaa mwata mwataqa  
vau mwatusaniaravaqa viro mwi kuava vitaro  
nritaro suvanta esaa mwi kuara riorama.

## 12

### *Kotira aatu aasu aatu sinta mwariate turama*

<sup>4</sup> Ni namwunaao, ini mwavana aasu rusesua sia  
mwisua aatu aatu siate. Mwisua ini rusenta ini  
mwaranavaqa sia so rusevarave.

<sup>5</sup> Né ntara aatuve sivara siavo? Sage ne ini  
timwa nyiase. Né Kotira aatu aatu siate. Mwiva  
kempusaqa siva mwaitaro mwiva vainti mwo  
ruse mwiraqaantai so mwi vaintira qutu visua  
vuanani untu pisaisaro mwaiso. Eo, ne iniara  
tina, Né Kotira aatu aatu sinta mwariate tuko,  
tiro. Sisasiva mwi kuara turama.

### *Vaaqara irainara mwatato vaintirara turama*

<sup>15</sup> ...Sisasiva esaa vainti nraase qora timwa nyiro  
tiro, Né surauri mwariate. Né vaaqara irainar-  
ave vaaqara monove mwarenta mwirara nro-  
raqamase nau riaqi vivo. Né vaaqara irainara  
mwatate so mwaiqi vuaraarave tivo. Vaaqara  
irainaravano sia ini saisaqa siranta né suqemase  
mwaiqi vivarave, tiro.

<sup>16</sup> Sisasiva mwitaa timwate mwiva mwo  
kuaqaa nuase timwa nyiro tiro, Vainti mwovano  
vaaqara irainara mwatova sarasaapa mwo utuse  
mwiraqaantai vaaqara sarasaapa mwase

<sup>17</sup> nrai timwase rie tiro, Ne ntaa nraavuraqive  
mwaa sarasaapara mwataasarave? Esaa ni  
nraavuqi sarasaapavano suaiqa siso, tiro tuvo.

<sup>18</sup> Mwitaa timwate mwiva qava tiro, Sage  
ne esaa nraavu nuquraasena qava nrora

nraavu vaaqara nraavu soqasena mwiraqi sarasaapavaqa mwitaa si irainaravaqa mwataase.

<sup>19</sup> Ne mwi airara taiqa sena mwitaa tiase, Ne suqema mwauko. Vaaqara sarasaapavaqa vaaqara irainaravaqa vaisana ne vaaqara isi qaqi mwaiqi vina mwaa sarasaaparavaqa nra- maivaga nramwaqi vina suqemase mwariasar- ave tiase, tiro.

<sup>20</sup> Mwi vaintiva mwitaa tuvaro Kotiva mwira timwa mwiro tiro, Sia ri vu aato vaisarave. Mate enaqi re qutu vinarave. Re qutu viraro rena tu- taase tiana irainarara mwovano mwi irainarara mwaraanarove turave, tiro.

<sup>21</sup> Sisasiva nraase qora mwitaa timwa nyiro mwi kuara taiqase mwiva mwisuara tiro, Vain- tivano soqaara aasu nau riaqi viro esaa soqaa vaaqara mwatataiva mwairaro Kotiva mwi vain- tirara tiro, Ri soqaa qumina irainarave. Ne takuaukara re mwaaqu vainti mwariaro. Re qaqi qutu vinarave tianarove, tiro. Sisasiva mwi kuara mwitaa turama.

## 15

### *Raumpirima vu vaintirara*

Sisasiva mwaa kuara timwa te tiro:

<sup>11</sup> Nraaru vainti mwovano qora nraaqiara taarama mwatatova mwauvaro

<sup>12</sup> naantiaraava mwaitaro nrai qorara tiro, Naantiara re ni miase tina irainarara mate vaa miane, tiro. Mwitaa tuvaro mwira qova nrai mwato irainarara nuqaaqamase nrai nraaqiaratana mwora mwiro mwora mwiro suvaro

<sup>13</sup> mwira mwaaqu naantiaraava pataqaa mwaitaro mwira qova nrai mwu irainarara mwosua nyiro ori mwarero untu niarani mwo mwatani mwariase tiro vura.

Mwiva niarani mwo mwatani viro mwini mwaitaro mwiva sia suqe vaintinravuvaqa mwariqiro viro

<sup>14</sup> nrai ori uro taiqa sero. Mwira orivano taiqa vuvaro mwauvaro mwi mwatarani sia saravaqa vaunani nrora qaranovaro

<sup>15</sup> mwiva mwaaqu vainti mwaitaro mwi mwatanaasua mwo vaintiqaa aira mwarorama. Mwiva mwo vaintiqaa aira mware mwauvaro mwirara uro quara sara nyiane tuvaro

<sup>16</sup> mwiva quara sara nyiro tiro, Mpo, nevaqa quara sara viti nyura nraataarave tuvaro mwira sara mwiari vaintiva sia mwauvaro

<sup>17</sup> nraataa suvaro mwi vaintiva mwariro aato tusero nau riase tiro, Ni nkora saiqa vaintivaravano vaaqara sarasaapa nre mwariavana ne mwaanto mwaitana sara nraataa sisana mwauko.

<sup>18</sup> Sage ne nena nkova sinani nanena vuase. Ne uro nanena mwirara mwitaa tiase. Ni nko, ne Kotira vuqaavaqa ri vuqaavaqa qaqiraqa si airara mwarauko.

<sup>19</sup> Ne mwitaa sinarara tina, ne sia so ri nraaqiara suqeva mwariasarave, Ne ri saiqa vainti aasu mwariasarave. Ne uro nanena ni nkora mwitaa tia mwiase, tuvo.

<sup>20</sup> Mwi vaintiva mwitaa tiasero mwiva ntiviro nrai qova sunani nrurama.

Mwiva mwini aarani viro mwira qora nraavu mwataqa nruvaro mwira qova mwira mwutu

takue mwiva mwirara riariamase sanero uro mwira mwaaqu navaatavuse mwira suvuqamase mwauvaro mwira mwaaquvano tiro,

<sup>21</sup> Ni nko, ne Kotira vuqaavaqa ri vuqaavaqa qaqiraqa si airara mwarauko. Ne mwitaa sukavara tina, ne sia so ri nraaqiara sugeva mwariasarave, tuvo.

<sup>22</sup> Mwitaa tuvaro mwira qova nrai aira mwaro vaitirara timwa nyiro tiro, Né uro tuavaaqa suqera aasu mwaqinta mwiri mwira mwiate. Saantavavaqa iraravaqa mwasenta sumwataate.

<sup>23</sup> Purumakau nraativaqa rusenta suntaate. Mate mwaasua mwirara riariama saare.

<sup>24</sup> Ni maaquvano qutu viso tukaro qaqi nri-naiso. Ni nraaqiaravano raumpirima viso tukaro qaqi qovarama viso, tuvo. Mwira qova mwitaama timwase riariamase sarasaapa mwase mwisua mwira vaasua utunurama.

<sup>25</sup> Mwisua mwira vaasua uti mwauvaro mwira vasaava saiqaintai nrinero riovanta

<sup>26</sup> isi ti mwauvaro riero mwiva nrai qora aira vainti mwo mwira riovaro mwiva mwitaa tiro,

<sup>27</sup> Ri qatavano mwevantai nrinaiaro ri qova mwirara riariamase purumakau nraati rusero sunta mwataiso. Mwiva ri qata sugemase vitase mwitaa riariamase mwaiso, tuvo.

<sup>28</sup> Mwitaa tuvaro mwira vasaava mwauvaro rara itovaro iqiru tusero sia nraavuqi virero mwaatani mwauvaro mwira qova mweva nero mwira sapara suvaro mwira mwaaquvano mwitaa tiro,

<sup>29</sup> Ne vaaqara isi ri aira mwarenta mwait-ana sia ne mwo enavaqa ri kua anuauko. Ne

nena tontivaravaqa riariama saare tukara re sia memeraa nraati mwonku nuqutu sera ni miaro.

<sup>30</sup> Mwaava ri mwaaguvano nraaserara nu-aararo mwaitaro mwiva re mwiana irainarara mwarero untu taiqase untu nane nrisarama re mwirara purumakau nraati suqera qumina mwirara nuqutu sera mwiaro, tuvo.

<sup>31</sup> Mwitaa tuvaro mwira qova qao tiro, Ni maaquo, re nivaqa mwariaravave. Ne mwu irainarara tentatana mwataunarave.

<sup>32</sup> Ri qatavano qutu viso tukaroma qaqi nri-naiso. Mwiva raumpirima viso tukaroma qaqi govarama viso. Mate te mwirara riariamase mwariare, turama. Sisasiva mwi kuara turama.

## 16

### *Sisasiva Rasarusirara tu kuara*

<sup>19</sup> Sisasiva mwitaa timwa sero mwiva mwo kua nraase qora ntu nusua timwa nyiro tiro, Vainti mwovano vaaqara irainara mwatatova suqe tu-avaaqa nukutova mwo nrau mwo nrau suqe su sarara aasu nretaro mwauvo.

<sup>20</sup> Mwi vaintiva mwi sarara aasu nretaro mwauvaro vainti mwovano mwira utu Rasarusiva mwauvanta mwosua mwi vaintira vitenta uro vaaqara irainara mwato vaintira qentaqaa i sovaro mwiva mwinto mwauvo. Mwi vaintiva sia irainaravaqa mwato vaintiva mwaagu vaintivano mwauvaro nrumwaaravano esaa mwira mwavanamaata vauvaro

<sup>21</sup> mwi vaintiva mwaitaro vaaqara irainara mwato vaintiva sara nretaro viti piso sarara mwi sarara aasu nrarero mwauvo. Sia irainara mwato vaintiva mwinto mwitaa mwauvanta

vairi mwonravuvano vitare nritare sitanta mwira nrumwaara mposu nrorama.

<sup>22</sup> Sia vaaqara irainara mwato vaintiva qutu vuvanta naavunyaasua mwira vita mwarenta uro Avarahaamuva nrai saivaqava mwaunani i senta. Mwira uro i sovaro mwinto mwauvaro

<sup>23</sup> vaaqara irainara mwato vaintiva mwivavaqa qutu vuvanta mwira mwataqi qunama tovaro mwiva qutu vusua mwaagani mwaitaro gara nuase mwauvo. Mwitaa mwaitaro mwutuni takuovaro Rasarusiva mwinto Avarahaamuravaqa mwaitaro sugema mwauvo.

<sup>24</sup> Mwinto mwitaa mwauvaro mwiva Avarahaamurara saparamase tiro, Avarahaamuo, tiri qo, niara mpo timwa mataane. Re Rasarusira vusi tiraro mwiva uro nrai saqu nramaiqi naasero untu ni maaqiriqaa mwatairaro ni maaqirivano sumpama vuarive. Ne nrora tia itairaqi mwarinama gara nina mwauko, tuvo.

<sup>25</sup> Mwitaa tuvaro Avarahaamuva qao tiro, Ni mpaio, re riaane. Re nraaru qaqi mwau enara suqe irainara mwate mwauraro Rasarusiva sia suqe irainara aasu mwatovave. Mate mwiva mwaanto mwaitaro sugema mwaisara re mwinto mwaitara gara nira mwariaro.

<sup>26</sup> Re qava rie mwaiqe mwo kua ri timwa mwiaase. Re mwariaranta te mwauraro qina nrora ravano yutana vaiso. Mwintai vuaso mwintai nriaso tiro Kotiva qina nrora mwataiso, tuvo.

<sup>27</sup> Avarahaamuva mwitaa tuvaro mwi vaintiva tiro, Mpo tiri qo, re Rasarusira vusi tiraro mwiva ni nkora nraavuqi uro mwaitaro

<sup>28</sup> ni nkata mpasaa nkuaanania saquru timwa nyiarive. Mwisuavaqa mwaini ita virani nrivo, tuvo.

<sup>29</sup> Mwitaa tuvaro Avarahaamuva qao tiro, Mosesivavaqa paropeti vaintivaravaqa qumwaarara to kuava vaiso. Mwisua mwi kuara so rieverave siavo, tuvo.

<sup>30</sup> Mwitaa tuvaro qaqi mwau enara vaaqara irainara mwato vaintiva tiro, Siave, tiri qo, Avarahaamuo, qutu vuari vaintiva uro nane timwa nysisanta mwisua mwira kua rietanta qaqiraqa si airara pisevarave siavo, tuvo.

<sup>31</sup> Mwitaa tuvaro Avarahaamuva qao tiro, Mwisua Mosesira kuavaqa paropeti vaintivara kuavaqa sia rientente, qutu vuari vaintiva uro nane tiari kuaravaqa mwisua sia so rieverave siavo turave turama. Sisasiva mwi kuara turama.

## 22

### *Sisasira navaatavu sora*

<sup>47</sup> Sisasiva mwini mwaitaro kua qaqi ti mwauvanta vaaqara vaintivano nrinora. Sisasira nraaqiara 12 nravuqintai Sutaasiva vaaqara vainti ntita mware mwiva naane mwisua ntuni nrero Sisasiva mwaunani nrinero uro Sisasira mota nare uti mwauvaro

<sup>48</sup> Sisasiva tiro, Sutaasio, re ni mota sera ni mwataqi mwatatai nraaqiarara nramwutaa ntuqaave ni qovarama senarave? tiro.

<sup>49</sup> Sisasiva mwitaa tuvanta mwira nraaqiaravara mwira vaqamase mwausua takuovanta



mwisua Sisasira navaatavu sarenta uti mwauvanta mwinravusua Sisasirara tinta, Nrora vaintio, tenravu paipaqontai mwisua tuqu saanarave? tinta.

<sup>50</sup> Sisasira nraaqiaravaravano mwitaa tuvaro mwinravusuaqintai mwovano Kotira aira mwara mwate mwau vaintisua mwisua vunyaa vainti aira vainti mwo tuguse mwira aato tuqu sovaro untu nuvaro Sisasiva sove tiro

<sup>51</sup> timwase mwi vaintira aatoqaa nrai saqu mwatatovaro mwira aatovano tavana vura.

<sup>52</sup> Kotira aira mwara mwate mwau vaintisua mwisua nroranravuvanovaqa, Kotira nraavuqaa naqisi mwau kiripuvanovaqa, nrora vainti mwonravuvanovaqa, mwisua Sisasira navaatavu sare nrusuara Sisasiva tiro, Né kamaanira vaqamase naquari vaintira votaamase navaatavu sarentave né paipavaqa saavuvaqa mware nriavo?

<sup>53</sup> Ne ini vaqamasena mwo nrau mwo nrau Kotira nraavuqi mwaiqina vi mwaukanta né sia ni navaatavu saarave. So mate mwaa enava ini enama vaiso. Mate rupisiqi mwariari irainava kempusaqama sianarove, tiro.

## 23

### *Sini tosani ruto vaintiva kua tura*

<sup>39</sup> Kamaanira kua anuo vaintiva mwovano sini tosani rutova mwivavaqa Sisasira sia suqe kua timwa mwi tiro, Qutaave re Mesaia vaintivano mwariaro? Re renavaqa tiritanavaqa saisaqa siane, tiro.

<sup>40</sup> Mwitaa tuvaro kamaanira kua anuo vaintiva mwovano qao tiro, Re siave Kotira aatu siaro? Mwisua tiritana votaamase mwiravaqa rutaavo.

<sup>41</sup> Mwisua tiritana so rutaavo. Mwisua tiritana sia suqe aira saara tiritana rutaavo. Mwi vaintiva sia qaqiraqa si airara mwaravave, tiro.

<sup>42</sup> Mwitaa tiase mwiva Sisasirara tiro, Sisasio, ri nroraqama saari enaraqaa re niaravaqa riaane, tiro.

<sup>43</sup> Mwitaa tuvaro Sisasiva tiro, Ne ri timwa mwiarira riaane. Mate re nivaqamase suqe mwatusani mwarinarave, tiro.

### *Sisasiva qutu vura*

<sup>44</sup> Mwitaa tuvaro suarivano mamatama nruvaro mwiraqaantai rupisima vuvaro sia suarivano itovaro rupisi aasu rutovaro suari tukiviro 3 kirokuqaa suvaro qava ataama vura.

<sup>45</sup> Ierusaremi mwatusani Kotira nraavuqi tausa votaama vuraqi nrora vaaqa siritova vutaqaa nrari nuqe vuvaro

<sup>46</sup> Sisasiva satariqaa mwaitaro nroraqamase oi aai tiase, tiro, Ni nko, ni mwarana mwarane, tiro. Mwitaa tiase Sisasiva qutu viro.

<sup>47</sup> Sisasiva qutu vuvaro naqu vaintisua qi-ata vaintivano Sisasiva mwitaa sura takuero Kotira utu tuaarere tiro, Qutaama mwaa vaintiva sugema nrue mwai vaintivave, tiro.

<sup>48</sup> Mwitaa tuvanta mwo susua mwi irainarava govora sura takuarenta suntu nukaama vusua mwisua mwaitanta takuama senta mwiraqaantai mwisua nyari mwaaqani nyari mwaaqani narenta vitanta mwuntusa sia suqe suvanta nyari mwuntusa nuqutuse vura.

49 Mwisua vuvanta Sisasira vataqi nrue mwau nraase qorasuavaqa, nraase mwonravu Kariri mwatantai Sisasira vataqi nrue mwau suavaqa, mwisua niarani mwaitanta mwi irainarava qovara sura takuora.

## 24

*Emeasi mwatusaniara vu vaintitanasuara tura*  
 13 Mwi enaraqaa Sisasira nraaqiara taaratana-vano mwo mwatusa Emeasi mwatusani virenta vura. (Taputantai voqaama Veqaurani voqaama mwira votaama Ierusalem vauvaro Emeasi mwatusa vaura.)

14 Mwitana aarani vitanta Sisasira ruso kuara timwaqi vinta.

15 Mwitana timwaqi vuvaro Sisasiva nrai nrinero mwitana vaqamase uro vuvanta

16 mwitana Sisasira takuenta sia mwira qintutama takuaraitinta, mwo vaintivanove tuvaro

17 Sisasiva mwitanara tiro, Netana aarani nritantama nara kuave nrai timwa mwi nrai timwa mwi vi mwariavo? tiro.

Mwitaa tuvanta mwitana uro mwiraqaa ntivinta mwitana mwuntusavano sia suqe suvanta mwaura.

18 Mwovano Kiropaasiva Sisasira mwata rie tiro, Mwaa enara vaaqara vaintinravuvano mwiri Ierusalemi mwariavara re nkuainkuvanove nanau qovarama vi kuara siave riaaro? tiro.

19 Mwitaa tuvaro Sisasiva, Nara kuave? tuvanta mwitana tinta, Sisasira Nasaretinyaara kuave. Mwi vaintiva paropeti vaintivano mwaitaro Kotira vuqaavaqa nraase qora ntuqaavaqa nrora aira mwaretanta suqe kua aasu tirave.

<sup>20</sup> Mwiva mwitaa si mwarisanta Kotira aira mwara mwate mwaria vaintisua mwisua nrora vaintivaravanovaqa, tiriqaa naqisi mwariasuavaqa, mwisua kamaanira mwira mwiavaro mwiva mwira rusaate tisanta mwira niriqontai satariqaa rutaarave.

<sup>21</sup> Te ntaaru mwi vaintirara Kotira mwira titais-aro mwiva mwo mwatanaasua aatarase tiri Is-araari mwatanaasuaqaa naqisiarivave tunarave. Kua mwovaqama vaiso. Mwira rusaavaro mate taaramo ena nritaraiso.

<sup>22</sup> Mate tetana nraasenravuvano tia kuara ri-enta isarama vuro. Mwinravusua ota toqaqi mwira qunama taaraqı uro nenta sia mwira mwavana takuaavo.

<sup>23</sup> Mwi nravusua uro nanenta mwiri tiri timwa timwi mwitaa tinta, Naavunyaasua tirinravuara mwiva qaqima mwaiso, tiavo, tiarave.

<sup>24</sup> Nraasenravuvano mwitaa tiavanta tirinravuqintai mwo vaintinravuvano mwira qunama taaraqı uro vi uro takuaavaro nraasenravuvano tia kuava mwivauma vaisanta mwinravusuavaqa mwira mwavana sia takuaarave, tinta.

<sup>25</sup> Mwitana mwitaa tuvaro Sisasiva mwitana timwa nyi tiro, Siave initana vu aato vaiso? Ntaaru paropeti vaintivaravano timwato kuara netaana mwi kuara qutaave tiataara vaisanta netaana gasomase mwi kuara rie mwariavo.

<sup>26</sup> Netaana siave riaavaro Kotiva titaari vaintiva mesaia vaintivano itavi irainarara mwaraqı viro mwiraqaantai nroraqamavi kempusa vaintivano mwarianarove, tiro.

<sup>27</sup> Mwitaa timwase Sisasiva Mesaia vaintiara Kotira vukuqi qara qumwaara rato kuara mwi-

tana timwa nyirero tosarero Mosesira vukuqintai timwa nyiqiro viro paropetivara vukuqintai timwa nyiqiro vura.

<sup>28</sup> Mwitaa ti mwauvaro mwitana virenta su mwatusava mwataqaa vauvaro Sisasisa aarana qaqi virero votaama uti mwauvanta mwitana qao tinta,

<sup>29</sup> Mate ena sianarove. Pisera tiritanavaqa vaitaane, tuvaro Sisasisa mwitanavaqa mwairero nraavuqi vura.

<sup>30</sup> Sisasisa nraavu mwiraqi mwaitaro sara taintaqaqa mwitana vaqamase mwataqaa mwai Kotirara suqeve timwase mpereti sara uveqase ntusamase nyuvanta mwitana vu aato qintutama vuvanta qintutama rienta

<sup>31</sup> mwitana mwira qintutamase takuovaro Sisasisa mwitana ntuqaantai qumpau vura.

<sup>32</sup> Sisasisa qumpau vuvanta mwitana nrai timwa mwi nrai timwa mwi tinta, Mpo, mwiva aarana nritaro Kotira vukuqintai kua tiritana timwa timwi mwaisaro gutaama tiritana mwuntusaqintai suqe siso, tinta.

<sup>33</sup> Mwitaa timwase mwitana vaavaama ntivinta mwiri nane Ierusaremi uro Sisasisa nraaqiara 11 nraavu mpuaamase takuovanta mwinravusua mwo vaintinravuvaqa suntu nukaama mwainta tinta,

<sup>34</sup> Nroravano gutaama qava qaqi ntiviso. Saimoniva mwivama mwira takuaivo tuvanta

<sup>35</sup> mwitanavaqa aarani nruenta takuorara mwisua timwa nyi tinta, Mwiva mpereti sara uveqa saisanta mwiraqaantai tetana nrora vainti qintutama takuaunarave, tinta.

*Sisasiva nrai nraaqiara ntuqaa qovarama vura*

<sup>36</sup> Mwitana kua mwisua timwa nyi mwauvaro vaavaama nroravano mwivama qovarama viro mwisua aaqani ntivi tiro, Ini mwuntusavano qisaaqama vasiarive, tiro.

<sup>37</sup> Mwitaa tuvanta mwisua nroraqamase aatu si tinta, Vaanavano qovarama viso, tuvaro Sisasiva mwisuara tiro,

<sup>38</sup> Né narare aatu si mwariavo? Né nararave niara taara aato nauri rie mwariavo?

<sup>39</sup> Né ni iqu saqu takuaate. Ne mwivama suko. Sia vaanavano ni votaamase mwativaqa mwusaarivaqa vaiso, tiro.

<sup>40</sup> Mwitaa timwase mwiva nrai iquvaqa saquvaqa tia nyuvanta

<sup>41</sup> mwisua mwoqamase riaria sinta saqu nunkinkiraarate tinta, Sia mwirara qutaave tiare, tuvaro Sisasiva mwisua mwata rie tiro, Sara nraariva vairove? tuvanta

<sup>42</sup> tavusa suntatora pataqa mwira mwuvaro

<sup>43</sup> Sisasiva mwisua ntuqaa mwaitaro mwarase nrora.

<sup>44</sup> Sisasiva tavusa nramwase mwisua timwa nyi tiro, Ntaaru ne inivaqa mwaitana ne mwaa kuara ini timwa nyurave. Niara ntaaru Mosesiva vukuqi qumwaara rato kuarave, paropeti vaintivaravano qumwaara rato kuarave, Saami vukuqi qumwaara rato kuarave, ne ini timwa nyitana mwi kuava mwivauma vasianarove, turave, tiro.

<sup>45</sup> Mwitaa timwase mwisua Kotira vukuqi qumwaara rato kuara qintutamase riaate tiro Sisasiva mwi kuara mwi kuara mwisua timwa nyi tiro,

<sup>46</sup> Mwaa kuara qumwaara ratorave, Mesaia vaintiara mwiva ita vuari irainara mwaqi uro qutu viro taaramo ena mwari qava qaqi ntivuanarove.

<sup>47</sup> Mwiraqaantai né ni airara ni utuara rietantama nraase qora timwa nyiqi vitanta sia suqe si aarara pisaivaro Kotiva né sia suqe airara mware kuara nrunka nyataanarove, tiate. Mwi kuara timwa nyiqi vitanta Ierusaremini naane mwi kuara timwa nyiqi vinta mwiraqaantai mwo mwatanaasua mwo mwatanaasua timwa nyiqi vuate.

<sup>48</sup> Nénravu nénta ntuqaantai mwi airara mwi irainarara takuaarave.

<sup>49</sup> Ni nkova nrai saqu iqiqaa mwatero nena ini nyirerave tiarinara nevano mwira titaariro tukuarive, Né mwaa mwatusaraqi mwaiqi vivaro naavuntai mwiva tukiro iniqaa mwaitaroma ini kempusa nyianarove, tiro.

*Sisasiva naavuni vita mwarora*

<sup>50</sup> Sisasiva mwithaa timwase mwiva mwisua ntita mware Ierusaremi mwatusa mwini se Vetaani mwatusani uro ne nrai saqutana tuaarerase mwisua suqema nyate.

<sup>51</sup> Sisasiva mwisua suqema nyate mwaitaro mwiva mwisua mwini sovaro mwira naavuni vita mwarora.

<sup>52</sup> Sisasiva naavuni vuvanta mwira nraaqiaravara mwini so vaintivarasua suqe suvanta mwiri nane Ierusaremini vinta uro mwini mwaitanta Kotira nraavuqi uro Kotira utu tuaareraqinta vi mwaura.

**Veqaura Baibel**  
**Portions of the New Testament in the Veqaura**  
**(Meauna) dialect of the Omwunra-Toqura (South**  
**Tairora) language of Papua New Guinea**  
**Sampela hap Nupela Testamen long tokples Veqaura**  
**long Niugini**

copyright © 2012 Wycliffe Bible Translators, Inc.

Language: Veqaura (Omwunra-Toqura or South Tairora)

Dialect: Veqaura (Meauna)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-03-19

---

PDF generated using Haiola and XeLaTeX on 28 Dec 2024 from source files dated 31 Aug 2023

7f17bf7b-ed7f-57a2-89c1-2b7308ad99ef